

四庫全書

集部

欽定四庫全書

集部  
文編卷二十九

詳校官檢討

臣德生

侍讀臣孫球覆勘

總校官進士臣楊懋珩

校對官編修臣汪鏞

謄錄舉人臣朱錫彤

欽定四庫全書

文編卷二十九

明 唐順之 編

武王

蘇軾

武王克殷以殷遺民封紂子武庚祿父使其弟  
管叔鮮蔡叔度相祿父治殷武王崩祿父與管  
蔡作亂成王命周公誅之而立微子於宋

蘇子曰武王非聖人也昔者孔子蓋罪湯武顧自以為

殷之子孫而周人也故不敢然數致意焉曰大哉巍巍乎堯舜也禹吾無間然其不足於湯武也亦明矣曰武盡美矣未盡善也又曰三分天下有其二以服事殷周之德其可謂至德也已矣伯夷叔齊之於武王也蓋謂之弑君至耻之不食其粟而孔子予之其罪武王也甚矣此孔子之家法也世之君子苟自孔氏必守此法國之存亡民之生死將於是乎在其孰敢不嚴而孟軻始亂之曰吾聞武王誅獨夫紂未聞弑君也自是學者以

湯武為聖人之正若當然者皆孔氏之罪人也使當時有良史如董狐者南巢之事必以叛書牧野之事必以弑書而湯武仁人也必將為法受惡周公作無逸曰殷王中宗及高宗及祖甲及我周文王茲四人迪哲上不及湯下不及武王亦以是哉文王之時諸侯不求而自至是以受命稱王行天子之事周之王不王不計紂之存亡也使文王在必不伐紂紂不見伐而以考終或死於亂殷人立君以事周命為二王後以祀殷君臣之道

豈不兩全也哉武王觀兵于孟津而歸紂若不改過則殷人改立君武王之待殷亦若是而已矣天下無王有聖人者出而天下歸之聖人所不得辭也而以兵取之而放之而殺之可乎漢末大亂豪傑並起荀文若聖人之徒也以為非曹操莫與定海內故起而佐之所以與操謀者皆王者之事也文若豈教操反者哉以仁義救天下天下既平神器自至將不得已而受之不至不取也此文王之道文若之心也及操謀九錫則文若死之

故吾嘗以文若為聖人之徒者以其才似張子房而道似伯夷也殺其父封其子其子非人也則可使其子而果人也則必死之楚人將殺令尹子南子南之子棄疾為王御士王泣而告之既而殺子南其徒曰行乎曰吾與殺吾父行將焉入然則臣王乎曰棄父事讐吾弗忍也遂縊而死武王親以黃鉞斬紂使武庚受封而不叛豈復人也哉故武庚之必叛不待智者而後知也武王之封武庚蓋亦不得已焉耳殷有天下六百年賢聖之

君六七作紂雖無道其故家遺俗未盡滅也三分天下有其二殷不伐周而周伐之誅其君夷其社稷諸侯必有不悅者故封武庚以慰之此豈武王之意哉故曰武王非聖人也

平王

蘇軾

太史公曰學者皆稱周伐紂居洛邑其實不然武王營之成王使召公卜居之居九鼎焉而周復都鄴鎬至犬戎敗幽王周乃東遷于洛



蘇子曰周之失計未有如東遷之謬也自平王至於亡  
非有大無道者也顧王之神聖諸侯服享然終以不振  
則東遷之過也昔武王克商遷九鼎于洛邑成王周公  
復增營之周公既沒蓋君陳畢公更居焉以重王室而  
已非有意于遷也周公欲葬成周而成王葬之畢此豈  
有意於遷哉今夫富民之家所以遺其子孫者田宅而  
已不幸而有敗至於乞假以生可也然終不敢議田宅  
今平王舉文武成康之業而大棄之此一敗而鬻田宅

者也夏商之王皆五六百年其先王之德無以過周而後王之敗亦不減幽厲然至於桀紂而後亡其未亡也天下宗之不如東周之名存而實亡也是何也則不鬻田宅之效也盤庚之遷復殷之舊也古公遷于岐方是時周人如狄人也逐水草而居豈所難哉衛文公東徙渡河恃齊而存耳齊遷臨淄晉遷于絳于新田皆其盛時非有所畏也其餘避寇而遷都未有不亡雖不即亡未有能復振者也春秋時楚大飢羣蠻叛之申息之北

門不啓楚人謀徙于阪高為賈曰不可我能往寇亦能往於是乎以秦人巴人滅庸而楚始大蘇峻之亂晉幾亡矣宗廟宮室盡為灰燼溫嶠欲遷豫章三吳之豪欲遷會稽將從之矣獨王導不可曰金陵王者之都也王者不以豐儉移都若宏衛文大帛之冠何適而不可不然雖樂土為墟矣且北寇方彊一旦示弱竄於蠻越望實皆喪矣乃不果遷而晉復安賢哉導也可謂能定大事矣嗟夫平王之初周雖不如楚之彊顧不愈於東晉

之微乎使平王有一王導定不遷之計收豐鎬之遺民而修文武成康之政以形勢臨東諸侯齊晉雖彊未敢貳也而秦何自霸哉魏惠王畏秦遷于大梁楚昭王畏吳遷于郢項襄王畏秦遷于陳考烈王畏秦遷于壽春皆不復振有亡徵焉東漢之末董卓劫帝遷于長安漢遂以亡近世李景遷于豫章亦亡故曰周之失計未有如東遷之謬也

始皇一

蘇軾

秦始皇帝時趙高有罪蒙毅按之當死始皇赦  
而用之長子扶蘇好直諫上怒使北監蒙恬兵  
於上郡始皇東游會稽並海走琅邪少子胡亥  
李斯蒙毅趙高從道病使蒙毅還禱山川未反  
而上崩李斯趙高矯詔立胡亥殺扶蘇蒙恬蒙  
毅卒以亡秦

蘇子曰始皇制天下輕重之勢使內外相形以禁奸備  
亂者可謂密矣蒙恬將三十萬人威振北方扶蘇監其

軍而蒙毅侍帷幄為謀臣雖有大奸賊敢睥睨其間哉  
不幸道病禱祀山川尚有人也而遣蒙毅故高斯得成  
其謀始皇之遣毅毅見始皇病太子未立而去左右皆  
不可以言智雖然天之亡人國其禍敗必出於智所不  
及聖人為天下不恃智以防亂恃吾無致亂之道耳始  
皇致亂之道在用趙高夫閹尹之禍如毒藥猛獸未有  
不裂肝碎首者也自書契以來惟東漢呂彊後唐張承  
業二人號稱善良豈可望一二於千萬以徼必亡之禍

哉然世主皆甘心而不悔如漢桓靈唐肅代猶不足深怪始皇漢宣皆英主亦湛於趙高恭顯之禍彼自以為聰明人傑也奴僕熏腐之餘何能為及其亡國亂朝乃與庸主不異吾故表而出之以戒後世人主如始皇漢宣者或曰李斯佐始皇定天下不可謂不智扶蘇親始皇子秦人戴之久矣陳勝假其名猶足以亂天下而蒙恬持重兵在外使二人不即受誅而復請之則斯高無遺類矣以斯之智而不慮此何哉蘇子曰嗚呼秦之失

道有自來矣豈獨始皇之罪自商鞅變法以殊死為輕  
典以慘夷為常法人臣狼顧脅息以得死為幸何暇復  
請方其法之行也求無不索禁無不止鞅自以為軼堯  
舜而駕湯武矣及其出亡而無所舍然後知為法之弊  
夫豈獨鞅悔之秦亦悔之矣荆軻之變持兵者熟視始  
皇環柱而走莫之救者以秦法重故也李斯之立胡亥  
不復忌二人者知威令之素行而臣子不敢復請也二  
人之不敢請亦知始皇之驚悍而不可回也豈料其偽



也哉周公曰平易近民民必歸之孔子曰有一言而可以終身行之其恕矣乎夫以忠恕為心而以平易為政則上易知而下易達雖有賣國之奸無所投其隙倉卒之變無自發焉然其令行禁止蓋有不及商鞅者矣而聖人終不以彼易此商鞅立信於徙木立威於棄灰刑其親戚師傳無惻容積威信之極以及始皇秦人視其君如雷電鬼神不可測也古者公族有罪三宥然後寘刑今至使人矯殺其太子而不忌太子亦不敢請則威

信之過也故夫以法毒天下者未有不反中其身及其子孫者也漢武與始皇皆果於殺者也故其子如扶蘇之仁則寧死而不請如戾太子之悍則寧反而不訴訴之而不察也戾太子豈欲反者哉計出於無聊也故為二君之子者有死與反而已李斯之智蓋足以知扶蘇之必不反也吾又表而出之以戒後世人主之果於殺者

始皇二

蘇軾

昔者生民之初不知所以養生之具擊搏挽裂與禽獸  
爭一旦之命惴惴然朝不謀夕憂死之不給是故巧詐  
不生而民無知而聖人惡其無別而憂其無所生也是  
以作為器用耒耜弓矢舟車網罟之類莫不備至使民  
樂生便利役御萬物而適其情而民始有以極其口腹  
耳目之欲器利用便而巧詐生求得欲從而心志廣聖  
人又憂其桀猾變詐而難治也是故制禮以反其初禮  
者所以反本復始也聖人非不知箕踞而坐不揖而食

便於人情而適於四體之安也將必使之習為迂闊難行之節寬衣博帶佩玉履舄所以回翔容與而不可以馳驟上至朝廷而下至於民其所以視聽其耳目者莫不近於迂闊其衣以黼黻文章其食以籩豆簠簋其耕以井田其進取選舉以學校其治民以諸侯嫁娶死喪莫不有法嚴之以鬼神而重之以四時所以使民自尊而不輕為奸故曰禮之近於人情者非其至也周公孔子所以區區於升降揖讓之間丁寧反覆而不敢失墜

者世俗之所謂迂闊而不知夫聖人之權固在於此也  
自五帝三代相承而不敢破至秦有天下始皇帝以詐  
力而并諸侯自以為智術之有餘而禹湯文武之不知  
出此也於是廢諸侯破井田凡所以治天下者一切出  
於便利而不耻於無禮決壞聖人之藩牆而以利器明  
示天下故自秦以來天下惟知所以求生避死之具而  
以禮者為無用贅疣之物何者其意以為生之無事乎  
禮也苟生之無事乎禮則凡可以得生者無所不為矣

嗚呼此秦之禍所以至今而未息歟昔者始有書契以  
科斗為文而其後始有規矩摹畫之迹蓋今所謂大小  
篆者至秦而更以隸其後日以變革貴於速成而從其  
易又創為紙以易簡策是以天下簿書符檄繁多委壓  
而吏不能究奸人有以措其手足如使今世而尚用古  
之篆書簡策則雖欲繁多其勢無由由此觀之則凡所  
以便利天下者是開詐偽之端也嗟夫秦既不可反矣  
苟後之君子欲治天下而惟便利之求則是引民而日

趨於詐也悲夫

漢高帝

蘓洵

漢高帝挾數用術以制一時之利害不如陳平揣摩天下之勢舉指搖目以劫制項羽不如張良微此二人則天下不歸漢而高帝乃木彊之人而止耳然天下已定後世子孫之計陳平張良智之所不及則高帝嘗先為之規畫處置以中後世之所為曉然如目見其事而為之者蓋高帝之智明於大而暗於小帝常語呂后曰周

勃重厚少文然安劉氏必勃也可令為太尉方是時劉氏既安矣勃又將誰安耶故吾之意曰高帝之以太尉屬勃也知有呂氏之禍也雖然其不去呂后何也勢不可也昔者武王沒成王幼而三監叛帝意百歲後將相大臣及諸侯王有武庚祿父者而無有以制之也獨計以為家有主母而豪奴悍婢不敢與弱子抗呂后佐帝定天下為大臣素所畏服獨此可以鎮壓其邪心以待嗣子之壯其不去呂后者為惠帝計也呂氏既不可去



故削其黨以損其權使雖有變而天下不搖是故以樊  
噲之功一旦遂欲斬之而無疑嗚呼彼豈獨於噲不仁  
耶且噲與帝偕起拔城陷陣功不為少矣方亞父嗾項  
莊時微噲誚讓羽則漢之為漢未可知也一旦人有惡  
噲欲滅戚氏者時噲出伐燕立命平勃即軍中斬之夫  
噲之罪未形也惡之者誠偽未必也且高帝之不以一  
女子斬天下之功臣亦明矣彼其娶於呂氏呂氏之族  
若祿產輩皆庸才不足恤獨噲豪健諸將所不能制後

世之患無大於此矣夫高帝之視呂后也猶醫者之視  
莖也使其毒可以治病而無至於殺人而已矣樊噲死  
則呂氏之毒將不至於殺人高帝以為是足以死而無  
憂矣彼平勃者遺其憂者也噲之死於惠之六年也天  
也彼其尚在則呂祿不可給太尉不得入北軍矣或謂  
噲於帝最親使之尚在未必與產祿叛夫韓信黥布盧  
綰皆南面稱孤而綰又最為親幸然及高帝之未崩也  
皆相繼以逆誅誰謂百歲之後椎埋屠狗之人見其親

戚得為帝王而不欣然從之耶吾故曰平勃者遺其憂者也

漢高帝

蘇軾

有進說於君者因其君之資而為之說則用力寡矣人唯好善而求名是故仁義可以誘而進不義可以劫而退若漢高帝起於草莽之中徒手奮呼而得天下彼知天下之利害與兵之勝負而已安知所謂仁義者哉觀其天資固亦有合於仁義者而不喜仁義之說此如小

人終日為不義而至以不義說之則亦怫然而怒故當時之善說者未嘗敢言仁義與三代禮樂之教亦惟曰如此而為利如此而為害如此而可如此而不可然後高帝擇其利與可者而從之蓋亦未嘗遲疑天下既平以愛故欲易太子大臣叔孫通周昌之徒力爭之不能得用留侯計僅得之嘗讀其書至此未嘗不太息以為高帝最易曉者苟有以當其心彼無所不從蓋亦告之以吕后太子從帝起於布衣以至於定天下天下望以

為君雖不肖而大臣心欲之如百歲後誰肯北面事戚  
姬子乎所謂愛之者祇以禍之嗟夫無有以奚齊卓子  
之所以死為高帝言者歟叔孫通之徒不足以知天下  
之大計獨有廢嫡立庶之說而欲持此以却之此固高  
帝之所輕為也人固有所不平使如意為天子惠帝為  
臣絳灌之徒圜視而起如意安得而有之孰與其全安  
而不失為王之利也如意之為王而不免於死則亦高  
帝之過矣不少抑遠之以泄吕后不平之氣而又厚封

焉其為計不已疎乎或曰呂后彊悍高帝恐其為變故欲立趙王此又不然自高帝之時而言之計呂后之年當死於惠帝之手呂后雖悍亦不忍奪之其子以與侄惠帝既死而呂后始有邪謀此出於無聊耳而高帝安得逆知之且夫事君者不能使其心知其所以然以樂從吾說而欲以勢奪之亦已危矣如留侯之計高帝顧戚姬悲歌而不忍特以其勢不得不從是以猶欲區區為趙王計使周昌相之此其心猶未悟以為一彊項之

周昌足以抗呂后而捍趙王不知周昌激其怒而速死之耳古之善原人情而深識天下之勢者無如高帝然至此而惑亦無有以告之者悲夫

項籍

蘇洵

吾嘗論項籍有取天下之才而無取天下之慮曹操有取天下之慮而無取天下之量劉備有取天下之量而無取天下之才故三人者終其身無成焉且夫不有所棄不可以得天下之勢不有所忍不可以盡天下之利

是故地有所不取城有所不攻勝有所不就敗有所不  
避其來不喜其去不怒肆天下之所為而徐制其後乃  
克有濟嗚呼項籍有百戰百勝之才而死於垓下無惑  
也吾於其戰鉅鹿也見其慮之不長量之不大未嘗不  
怪其死於垓下之晚也方籍之渡河沛公始整兵嚮關  
籍於此時若急引軍趨秦及其鋒而用之可以據咸陽  
制天下不知出此而區區與秦將爭一旦之命既全鉅  
鹿而猶徘徊河南新安間至函谷則沛公入咸陽數月



矣夫秦人既已安沛公而讐籍則其勢不得彊而臣故籍雖遷沛公漢中而卒都彭城使沛公得還定三秦則天下之勢在漢不在楚楚雖百戰百勝尚何益哉故曰兆垓下之死者鉅鹿之戰也或曰雖然籍必能入秦乎曰項梁死章邯謂楚不足慮故移兵伐趙有輕楚心而良將勁兵盡於鉅鹿籍誠能以必死之士擊其輕敵寡弱之師入之易耳且亡秦之守關與沛公之守善否可知也沛公之攻關與籍之攻善否又可知也以秦之守

而沛公攻入之沛公之守而籍攻入之然則亡秦之守籍不能入哉或曰秦可入矣如救趙何曰虎方哺鹿羆據其穴搏其子虎安得不置鹿而返返則碎於羆明矣軍志所謂攻其必救也使籍入關王離涉間必釋趙自救籍據關逆擊其前趙與諸將救者十餘壁躡其後覆之必矣是籍一舉解趙之圍而收功於秦也戰國時魏伐趙齊救之田忌引兵疾走大梁因存趙而破魏彼宋義號知兵殊不達此屯安陽不進而曰待秦敝吾恐秦

未敝而沛公先據關矣籍與義俱失焉是故古之取天下者常先圖所守諸葛孔明棄荊州而就西蜀吾知其無能為也且彼未嘗見大險也彼以為劔門者可以不亡矣吾嘗觀蜀之險其守不可出其出不可繼兢兢而自完猶且不給而何足以制中原哉若夫秦漢之故都沃土千里洪河大山真可以控天下又烏事夫不可以措足如劔門者而後曰險哉今夫富人必居四通五達之都使其財布出於天下然後可以收天下之利有小

丈夫者得一金櫝而藏諸家拒戶而守之嗚呼是求不失也非求富也大盜至刼而取之又焉知其果不失也

晉宣帝

蘇轍

世之說者曰司馬仲達之於魏則曹孟德之於漢也是不然二人智勇權略則同而所處則異漢自董卓之後內潰外叛獻帝奔走困踣之不暇帝王之勢盡矣獨其名在耳曹公假其名號以服天下擁而植之許昌建都邑征叛逆皆曹公也雖使終身奉獻帝率天下而朝之

天下不歸漢而歸魏者十室而九矣曹公誠能安而俟之使天命自至雖文王三分天下有其二以事紂何以加之惜其為義不終使獻帝不安於上義士憤怨于下雖荀文若猶不得其死此則曹公之過矣如司馬仲達則不然明帝之末曹氏之業固矣雖明帝以淫虐失衆曹爽以驕縱得罪而顛覆之形未見天下未叛魏也仲達因其隙而乘之拊其背而奪其成業事與曹公異矣漢武帝之老也託昭帝於霍光昭帝尚幼燕王蓋主有

篡取之心上官桀桑洪羊助之此其禍急於曹爽霍光  
內斃燕蓋外誅桀羊擁護昭帝訖無驕君之色及昭帝  
早喪國空無主迎立昌邑昌邑不令又援立宣帝柄在  
其手者屢矣然退就臣位不以自疑中外悉其本心亦  
無一人有異議者以仲達擬光孰為得之耶然光猶不  
足道蜀先主將亡召諸葛孔明而告之曰嗣子可輔輔  
之如其不才君可自取復語後主汝與丞相從事事之  
如父後主之闇弱孔明之賢智蜀人知之矣使孔明有

異志一搖手而定矣然外平徼外蠻夷內廢李平廖立  
旁禦魏吳功成業定又付之蔣琬費禕奉一昏主三十  
餘年而無纖芥之隙此又霍光之所不能望也故人患  
不誠苟誠忠孝舜之於父母伊尹之於太甲終無間然  
者自仲達之後人臣受六尺之寄因而取之者多矣皆  
以地勢迫切置而不取則身必危國必亂至自比騎虎  
不可復下此亦自欺而已哉

晉武帝

蘇轍

立嫡以長不以賢立子以貴不以長古今之正義也然  
堯廢丹朱用舜而天下安帝乙廢微子立紂而商以亡  
古之人蓋有不得已而行之者矣得已而不已不得已  
而已之二者皆亂也子非朱紂而廢天下之正義君子  
不忍也子如朱紂而守天下之正義君子不為也漢高  
帝始謂惠帝仁弱欲廢之而立如意既而知人心之在  
太子也則寢廢立之議而用平勃平勃皆賢而權任均  
故惠帝雖沒產祿雖橫而援立文帝漢室不病也武帝



既老知燕王旦廣陵王胥之不可用也廢之而立少子  
任霍光金日磾上官桀桑洪羊以後事當是時昭帝之  
賢否未可知而四人枉直相半也幸而昭帝明哲霍光  
忠良桀羊雖欲為亂而不遂其後復廢昌邑立宣帝而  
朝廷晏然無患蓋人君不幸而立幼主當如二帝屬任  
賢臣乃免於亂此必然之勢也魏明帝疾篤而無子棄  
遠宗子而立齊王始欲輔以曹宇曹肇而倖臣劉放孫  
資不便宇肇之正勸帝易以司馬仲達曹爽齊王既非

天下之望而爽又以庸才與仲達奸雄為對數年之間  
遂成篡弑之禍晉武帝親見此敗矣惠帝之不肖羣臣  
舉知之而牽制不忍忌齊王攸之賢而恃愍懷之小慧  
以為可以消未然之憂獨有一汝南王亮而不早用舉  
社稷之重而付之楊駿至於一敗塗地無足怪也帝之  
出齊王也王渾言於帝曰攸之於晉有姬旦之親若預  
聞朝政則腹心不貳之臣也國家之事若用后妃外親  
則有呂氏王氏之虞付之同姓至親則有吳楚七國之

慮事任輕重所在未有不為害者也惟當任正道求忠良不可事事曲設疑防慮方來之患也若以智猜物雖親見疑至於疏遠亦安能自保乎人懷危懼非為安之理此最國家之深患也渾之言天下之至言也帝不能用而用王佑之計使太子母弟秦王東都督關中楚王瑋淮南王允並鎮守要害以彊帝室然晉室之亂實成於八王吾嘗籌之如攸之親賢奪嫡之禍非其志也不幸至此天下所宗宗社之計猶有賴也如佑之計使子

弟據兵以捍外患如梁孝王之禦吳楚尚可若變從中起而使人人握兵以救內難此與何進袁紹召丁原董卓以除宦官何異古人有言擇福莫若重擇禍莫若輕如武帝之擇禍福可謂不審矣

梁武帝

蘇轍

史稱孔子既見老子退謂弟子曰鳥吾知其能飛魚吾知其能游獸吾知其能走走者可以為網游者可以為綸飛者可以為繒至於龍吾不能知其乘雲氣而上天

吾今日見老子其猶龍邪老子體道而不嬰於物孔子至以龍比之然卒不與共斯世也捨禮樂政刑而欲行道於世孔子固知其難哉東漢以來佛法始入中國其道與老子相出入漢世士大夫不能明也魏晉以後畧知之矣好之篤者則欲施之於世疾之深者則欲絕之於世二者皆非也老佛之道與吾道同而欲絕之老佛之教與吾教異而欲行之皆失之矣秦姚興區區一隅招延緇素譯經談妙至者凡數千人而姚氏之亡曾不

旋踵梁武繼之江南佛事前世所未嘗見至捨身為奴  
隸郊廟之祭不薦毛血父子皆陷於侯景而國隨以亡  
議者觀秦梁之敗則以佛法為不足賴矣後魏太武深  
信崔浩浩不信佛法勸帝斥去僧徒毀經壞寺既滅佛  
法而浩亦以非罪赤族唐武宗欲求長生徇道士之私  
夷佛滅僧不期年而以弑崩議者觀魏唐之禍則以佛  
法為不可悟矣二者皆見其一偏耳老佛之道非一人  
之私說也自有天地而有是道矣古之君子以之治氣

養心其高不可嬰其潔不可溷天地神人皆將望而敬之老子曰天得一以清地得一以寧神得一以靈谷得一以盈萬物得一以生侯王得一以為天下貞道之於物無所不在而尚可非乎雖然蔑君臣廢父子而以行道於世其弊必有不可勝言者

唐高祖

蘇轍

唐高祖起太原其謀發於太宗諸子不與也及克長安誅鋤羣盜天下為一其功亦出於太宗蓋天心之所付

予人心之所歸向其在太宗者審矣至立太子高祖以長立建成建成當之不辭於是兄弟疑間卒至大亂夫建成不足言也其咎在高祖其後武氏之亂廢中宗立睿宗以睿宗長子憲為太子矣及中宗之復睿宗父子皆以王就第韋氏之亂臨淄以兵入討睿宗踐阼而唐室復安又將以長立憲憲辭曰時平先長嫡國亂先有功不如此必且有難敢以死請睿宗從之而後臨淄之位定以太宗之賢而不免於爭奪玄宗之賢不逮太宗



而晏然受命則憲之讓賢於人遠矣吾嘗論之高祖睿  
宗皆中主也其欲立長非專其私也以爲立嫡以長古  
今之正義也謂之正義而不敢違胡不考之前世乎太王  
捨泰伯仲雍而立季歷文王捨伯邑考而立武王而周以  
之興誠天命之所在而吾無心焉亂何自生雖然泰伯  
奔吳以避王季亦畏亂故爾廢長而立少雖聖賢猶難  
之憲與玄宗兄弟相安終身無間言焉蓋古今一人而已

唐太宗

蘇轍

唐太宗之賢自西漢以來一人而已任賢使能將相莫非其人恭儉節用天下幾至刑措自三代以下未見其比也然傳子至孫遭武氏之亂子孫為戮不絕如綫後世推原其故而不得以吾觀之惜夫其未聞大道也哉昔楚昭王有疾卜之曰河為祟大夫請祭諸郊王曰三代命祀祭不越望江漢睢漳楚之望也禍福之至不是過也不穀雖不德河非所獲罪也遂弗祭及將死有雲如衆赤鳥夾日以飛三日王使問周史史曰其當王身

乎若榮之可移於令尹司馬王曰除腹心之疾而寘諸股肱何益不穀不有大過天其夭諸有罪受罰又焉移之亦弗榮孔子聞之曰楚昭王知大道矣其不失國也宜哉吾觀太宗所為其不知道者衆矣其能免乎貞觀之間天下既平征伐四夷滅突厥夷高昌殘吐谷渾兵出四克務勝而不知止最後親征高麗大臣力爭不從僅而克之其賢於隋氏者幸一勝耳而帝安為之原其意亦欲夸當時高後世耳太子承乾既立十餘年復寵

魏王泰使兄弟相傾承乾既廢晉王嫡子也欲立泰而使異日傳位晉王疑不能決至引佩刀自刺大臣救之而止父子之間以愛故輕予奪至於如此帝嘗得秘讖言唐後必中微有女武代王以問李淳風欲求而殺之淳風曰其兆既已成在宮中矣天之所命不可去也徒使疑似之戮淫及無辜且自今已往四十年其人已老老則仁雖受終易姓必不能絕李氏若殺之復生壯者多殺而逞則子孫無遺類矣帝用其言而止然猶以疑

似殺李君羨夫天命之不可易惟修德或能已之而帝  
欲以殺人弭之難哉帝之老也將擇大臣以輔少主李  
勣起於布衣忠力勁果有節俠之氣嘗事李密及單雄  
信密敗不忍以其地求利密死不廢舊君之禮雄信將  
戮以股肉啗之使與俱死帝以是為可用疾革謂高宗  
爾於勣無恩今以事出之我死即授以僕射高宗從之  
及廢王后立武昭儀召勣與長孫無忌褚遂良計之勣  
稱疾不至帝曰皇后無子罪莫大於絕嗣將廢之遂良

等不可它日勣見帝曰將立昭儀而顧命大臣皆以為不可今止矣勣曰此陛下家事不須問外人由此廢立之議遂定勣匹夫之俠也以死徇人不以為難至於禮義之重社稷所由安危勣不知也而帝以為可以屬幼孤寄天下過矣且使勣信賢託國於父竭忠力以報其子可也何至父逐之子復之而後可哉挾數以待臣下於義既已薄矣凡此皆不知道之過也苟不知道則凡所施於世必有逆天理失人心而不自知者故楚昭王

惟知大道雖失國而必復太宗惟不知道雖天下既安且治而幾至於絕滅孔子之所以觀國者如此

魯隱公一

蘇軾

魯隱公元年不書即位攝也公子翬請殺桓公  
公曰為其少故也吾將授之矣使營菟裘吾將  
老焉翬懼反譖公於桓而使賊殺公 歐陽子  
曰隱公非攝也使隱而果攝則春秋不書為公  
春秋書為公則隱公非攝無疑也

蘇子曰非也春秋信史也隱攝而桓弑著於史也詳矣  
周公攝而克復子者也以周公薨故不稱王隱公攝而  
不克復子者也以魯公薨故稱公史有謚國有廟春秋  
獨得不稱公乎然則隱公之攝也禮歟曰禮也何自聞  
之曰聞之孔子曾子問曰君薨而世子未生如之何孔  
子曰卿大夫士從攝主北面於西階南何謂攝主曰古  
者天子諸侯卿大夫之世子未生而死則其弟若兄弟  
之子以當立者為攝主子生而女也則攝主立男也則



攝主退此之謂攝主古之人有為之者季康子是也季桓子且死命其臣正常曰南孺子之子男也則以告而立之女也則肥也可桓子卒康子即位既葬康子在朝南氏生男正常載以如朝告曰夫子有遺言命其圉臣曰南氏生男則以告於君與大夫而立之今生矣男也敢告康子請退康子之謂攝主古之道也孔子行之自秦漢以來不脩是禮而以母后攝孔子曰唯女子與小人為難養也使與聞外事且不可曰牝雞之晨惟家之

索而況可使攝位而臨天下乎女子為政而國安唯齊之君王后吾宋之曹高后也蓋亦千一矣自東漢馬鄧不能無譏而漢吕后魏胡武靈唐武氏之流蓋不勝其亂王莽楊堅遂因以易姓由是觀之豈若攝主之庶幾乎使母后而可信則攝主亦可信也若均之不可信則攝主取之猶吾先君之子孫也不猶愈於異姓之取哉或曰君薨而百官總已以聽於冢宰三年安用攝主曰非此之謂也嗣天子長矣宅憂而未出令則以禮從冢

宰若太子未生生而弱未能君也則三代之禮孔子之學決不以天下付異姓其付之攝主也夫豈非禮而周公行之歟故隱公亦攝主也鄭玄儒之陋者也其傳攝主也曰上卿代君聽政者也使子生而女則上卿豈繼世者乎蘇子曰攝主先王之令典孔子之法言也而世不知習見母后之攝也而以為當然故吾不可不論以待後世之君子

宋襄公

蘇軾

魯僖公二十二年冬十有一月己巳朔宋公及  
楚人戰于泓宋師敗績春秋書戰未有若此之  
嚴而盡也

蘇子曰宋公天子之上公宋先代之後於周為客天子  
有事膳焉有喪拜焉非列國諸侯之所敢敵也而曰及  
楚人戰于泓楚夷狄之國人微者之稱以天子之上公  
而當夷狄之微者至於敗績宋公之罪蓋可見矣而公  
羊傳以為文王之師不過是學者疑焉故不可以不辨

宋襄公非獨行仁義而不終者也。以不仁之資盜仁者之名。爾齊宣捨一牛於德。未有所損益。孟子予之以王。而宋襄公執鄫子用於次睢之社。戕一國君若犬豕然。此而忍為之。天下孰有不忍者耶。泓之役。身敗國亡。乃欲以不重傷不禽二毛欺諸侯。人能紆其兄之臂以取食。而能忍飢於壺飧者。天下知其不情也。桓文之師存亡繼絕。猶不齒於仲尼之門。況用人於夷鬼以求霸。而謂之王者之師可乎。使鄫子有罪而討之。雖聲之諸侯。

而戮於社天下不以為過若以喜怒興師則秦繆公獲  
晉侯且猶釋之而況敢用諸昏淫之鬼乎以愚觀之宋  
襄公王莽之流其不能欺天下則同也其不鼓不成列  
不能損襄公之虐其抱孺子以泣不能蓋王莽之篡使  
莽無成則宋襄公襄公得志亦一莽也古人有言圖王  
不成其弊猶足以霸襄公行王者之事猶足以當桓文  
之師一戰之餘救死扶傷不暇此獨妄庸耳齊桓晉文  
得管仲子犯以興襄公有一子魚不能用豈可同日而

語哉自古失道之君如是者多矣死而論定未有如宋襄公之欺於後世者也

魏武帝

蘇軾

世之所謂智者知天下之利害而審乎計之得失如斯而已矣此其為智猶有所窮唯見天下之利而為之唯其害而不為則是有時而窮焉亦不能盡天下之利古之所謂大智者知天下利害得失之計而權之以人是故有所犯天下之至危而卒以成大功者此以其人權

之輕敵者敗重敵者無成功何者天下未嘗有百全之利也舉事而待其百全則必有所格是故知吾之所以勝人而人不知其所以勝我者天下莫能敵之昔者晉荀息知虞公必不能用宮之奇齊鮑叔知魯君必不能用施伯薛公知黥布必不出於上策此三者皆危道也而直犯之彼不知用其所長又不知出吾之所忌是故不可以冒害而就利自三代之亡天下以詐力相并其道術政教無以相過而能者得之當漢氏之衰豪傑並



起而圖天下二袁董呂爭為彊暴而孫權劉備又以區區於一隅其用兵制勝固不足以敵曹氏然天下終於分裂訖魏之世而不能一蓋試嘗論之魏武長於料事而不長於料人是故有所重發而喪其功有所輕為而至於敗劉備有蓋世之才而無應卒之機方其新破劉璋蜀人未附一日而四五驚斬之不能禁釋此時不取而其後遂至於不敢加兵者終其身孫權勇而有謀此不可以聲勢恐喝取也魏武不用中原之長而與之爭

於舟楫之間一日一夜行三百里以爭利犯此二敗以  
攻孫權是以喪師於赤壁以成吳之彊且夫劉備可以  
急取而不可以緩圖方其危疑之間卷甲而趨之雖兵  
法之所忌可以得志孫權者可以計取而不可以勢破  
也而欲以荊州新附之卒乘勝而取之彼非不知其害  
特欲僥倖於權之不敢抗也此用之於新造之蜀乃可  
以逞故夫魏武重發於劉備而喪其功輕為於孫權而  
至於敗此不亦長於料事而不長於料人之過歟嗟夫

事之利害計之得失天下之能者舉知之而不能權之以人則亦紛紛焉或勝或負爭為雄彊而未見其能一也

苻堅

蘇轍

苻堅王猛君臣相得以成霸功雖齊桓管仲不能過也猛之將死也堅問以後事猛曰晉雖僻處吳越然正朔相承親仁善鄰國之寶也臣沒之後願勿以晉為圖鮮卑羌虜我之仇讐終為人患宜漸除之以寧社稷言終

而死堅不能用卒大舉伐晉敗于淝上歸未反國而慕容垂叛之既反國而姚萇叛之地分身死終斃於二人之手故後世皆多猛之賢而咎堅之不明吾嘗論之堅雖有霸者之畧而懷無厭之心以天下不一為深耻雖滅燕定蜀并秦涼下西域而其貪未已兵革歲克而不知懼也晉雖微弱謝安桓冲為之將相君臣相安民未忘晉而欲以力取之稽之天道論之人情雖內無垂萇之釁而堅之敗必不免矣然堅以遠裔之餘而有帝王

之度其滅慕容姚也收二姓之子弟錄其才能而官使之布滿中外凡其舊臣無不疑者若以世俗言之則以漸除之如猛之計得矣若以帝王之事言之則堅之意未必過也大雅之稱文王曰殷之孫子其麗不億上帝既命侯于周服侯服于周天命靡常殷士膚敏裸將于京厥作裸將常服黼呶文王用人其廣如此而堅何尤焉德雖不若文王而竊慕焉顧其所以處之何如耳文武既沒周公成王之際殷之遺孽猶與管蔡間周之隙

曰予復反鄙我周邦故周公克殷改封微子于宋而遷其頑民於洛邑保釐東郊作多士而撫寧之所以慮其變者至矣至若君陳畢公皆迭居成周而董帥之故康王之命畢公曰毖殷頑民遷于洛邑密邇王室式化厥訓既歷三紀世變風移四方無虞予一人以寧然猶曰邦之安危惟茲殷士由此觀之文王之用殷人豈苟然而已哉今堅畜養豺虎於其腹心而貪功務勝不顧其後宜其斃於匪莪也哉使堅信猛之策南結鄰好戢兵

保境與民休息雖有垂萇百人安能動之文王雖未可  
覲然亦非王猛之所及矣

孔子

蘇軾

魯定公十三年孔子言於公曰臣無藏甲大夫  
無百雉之城使仲由為季氏宰將墮三都於是  
叔孫氏先墮郈季氏將墮費公山弗狃叔孫輒  
率費人襲公公與三子入於季氏之宮孔子命  
申句須樂頎下伐之費人北二子奔齊遂墮費

將墮成公斂處父以成叛公圍成弗克或曰殆哉孔子之為政也亦危而難成矣孔融曰古者王畿千里寰內不以封建諸侯曹操疑其論建漸廣遂殺融融特言之耳安能為哉操以為天子有千里之畿將不利已故殺之不旋踵季氏親逐昭公公死於外從公者皆不敢入雖子家羈亦亡季氏之忌克忤害如此雖地勢不及曹氏然君臣相猜蓋不減操也孔子安能以是時



墮其名都而出其藏甲也哉考於春秋方是時  
三桓雖若不悅然莫能違孔子也以爲孔子用  
事於魯得政與民而三桓畏之歟則季桓子之  
受女樂也孔子能却之矣彼婦之口可以出  
走是孔子畏季氏季氏不畏孔子也夫孔子盍  
姑修其政刑以俟三桓之隙也哉

蘇子曰此孔子之所以聖也蓋田氏六卿不服則齊晉  
無不亡之道三桓不臣則魯無可治之理孔子之用於

世其政無急於此者矣彼晏嬰者亦知之曰田氏之僭  
惟禮可以已之在禮家施不及國大夫不收公利齊景  
公曰善哉吾今而後知禮之可以為國也嬰能知之而  
莫能為之嬰非不賢也其浩然之氣不及孔孟也孔子  
以羈旅之臣得政期月而能舉治世之禮以律亡國之  
臣墮名都出藏甲而三桓不疑其害已此必有不言而  
信不怒而威者矣孔子之聖見於行事至此為無疑也  
嬰之用於齊也久於孔子景公之信其臣也愈於定公

而田氏之禍不少衰吾是以知孔子之難也孔子以哀公十六年卒十四年陳恒弑其君孔子沐浴而朝請討之吾是以知孔子之欲治列國之君臣使如春秋之法者至於老且死而不忘也或曰孔子知哀公與三子之必不從而以禮告也歟曰否孔子實欲伐齊孔子既告公公曰魯為齊弱久矣子之伐之將若之何對曰陳恒弑其君民之不予者半以魯之衆加齊之半可克也此豈禮告而已哉哀公患三桓之偏常欲以越伐魯而去

之夫以蠻夷伐國民不予也臯如出公之事斷可見矣  
豈若從孔子而伐齊乎若從孔子而伐齊則凡所以勝  
齊之道孔子任之有餘矣既克田氏則魯之公室自張  
三桓不治而自服也此孔子之志也

子貢

蘇洵

君子之道智信難信者所以正其智也而智常至於不  
正智者所以通其信也而信常至於不通是故君子慎  
之也世之儒者曰徒智可以成也人見乎徒智之可以

成也則舉而棄乎信吾則曰徒智可以成也而不可以  
繼也子貢之以亂齊滅吳存魯也吾悲之彼子貢者遊  
說之士苟以邀一時之功而不以可繼為事故不見其  
禍使夫王公大人而計出於此則吾未見其不旋踵而  
敗也吾聞之王者之兵計萬世而動霸者之兵計子孫  
而舉彊國之兵計終身而發求可繼也子貢之兵是明  
日不可用也故子貢之出也吾以為魯可存也而齊可  
無亂吳可無滅何也田常之將篡也憚高國鮑晏故使

移兵伐魯為賜計者莫若抵高國鮑晏弔之彼必愕而問焉則對曰田常遣子之兵伐魯吾竊哀子之將亡也彼必詰其故則對曰齊之有田氏猶人之養虎也子之於齊猶肘股之於身也田氏之欲肉齊久矣然未敢逞志者懼肘股之捍也今子出伐魯肘股去矣田氏孰懼哉吾見身將磔裂而肘股隨之所以弔也彼必懼而咨計於我因教之曰子悉甲趨魯壓境而止吾請為子潛約魯侯以待田氏之變帥其兵從子入討之彼懼田氏

之禍其勢不得不聽歸以約魯侯魯侯懼齊伐其勢亦不得不聽因使練兵蒐乘以俟齊釁誅亂臣而定新主齊必德魯數世之利也吾觀仲尼以為齊人不與田常者半故請哀公討之今誠以魯之衆從高國鮑晏之師加齊之半可以輟田常於都市其勢甚便其成功甚大惜乎賜之不出於此也齊哀王舉兵誅呂氏呂氏以灌嬰為將拒之至滎陽嬰使使諭齊及諸侯連和以待呂氏變共誅之今田氏之勢何以異此有魯以為齊有高

國鮑晏以為灌嬰惜乎賜之不出於此也

子思 蘇軾

昔者夫子之文章非有意於文是以未嘗立論也所可得而言者唯其歸於至當斯以為聖人而已矣夫子之道可由而不可知可言而不可議此其不爭為區區之論以開是非之端是以獨得不廢以與天下後世為仁義禮樂之主夫子既沒諸子之欲為書以傳於後世者其意皆存乎為文汲汲乎唯恐其汨沒而莫吾知也是



故皆喜立論論立而爭起自孟子之後至於荀卿楊雄  
皆務為相攻之說其餘不足數者紛紜於天下嗟夫夫  
子之道不幸而有老聃莊周楊朱墨翟田駢慎到申不  
害韓非之徒各持其私說以攻乎其外天下方將惑之  
而未知其所適從奈何其弟子門人又內自相攻而不  
決千載之後學者愈衆而夫子之道益晦而不明者由  
此之故歟昔三子之爭起於孟子孟子曰人之性善是  
以荀子曰人之性惡而楊子又曰人之性善惡混孟子

既已據其善是故荀子不得不出於惡人之性有善惡而已二子既已據之是以楊子亦不得不出於善惡混也為論不求其精而務以為異於人則紛紛之說未可以知其所止且夫夫子未嘗言性也蓋亦嘗言之矣而未有必然之論也孟子之所謂性善者皆出於其師子思之書子思之書皆聖人之微言篤論孟子得之而不善用之能言其道而不知其所以為言之名舉天下之大而必之以性善之論昭昭乎自以為的於天下使天

下之過者莫不欲援弓而射之故夫二子之為異論者  
皆孟子之過也子思論聖人之道出於天下之所能行  
而孟子論天下之人皆可以行聖人之道此無以異者  
而子思取必於聖人之道孟子取必於天下之人故夫  
後世之異議皆出於孟子

孟軻  
蘇軾

昔者仲尼自衛反魯網羅三代之舊聞蓋經禮三百曲  
禮三千終年不能究其說夫子謂子貢曰賜爾以吾為

多學而識之者與非也予一以貫之天下苦其難而莫之能用也不知夫子之有以貫之也是故堯舜禹湯文武周公之法度禮樂刑政與當世之賢人君子百家之書百工之技藝九州之內四海之外九夷八蠻之事荒忽誕謾而不可考者雜然皆列于胸中而有卓然不可亂者此固有以一之也是以博學而不亂深思而不惑蓋嘗求之于六經至於詩與春秋之際而後知聖人之道始終本末各有條理夫王化之本始於天下之易行

天下固知有父子也天下固知有兄弟也孝悌足而王道備此固非有深遠而難見勤苦而難行者也故詩之為教也使人歌舞佚樂無所不至要在於不失正焉而已矣雖然聖人固有所甚畏也一失容者禮之所由廢也一失言者義之所由亡也君臣之相攘上下之相殘天下大亂未嘗不始於此道是故春秋力爭於毫釐之間而深明乎疑似之際截然其有所必不可為也不觀於詩無以見王道之易不觀於春秋無以知王政之難

自孔子沒諸子各以所聞著書而皆不得其源流故其  
言無有統要若孟子可謂深於詩而長於春秋者矣其  
道始於至粗而極於至精充乎天地放乎四海而毫釐  
有所必計至寬而不可犯至密而可樂者此其中必有  
所守而後世或未之見也

老子

蘇轍

孔子以仁義教人而以禮樂治天下仁義禮樂之變無  
窮而其稱曰吾道一以貫之苟無以貫之則因變而行

義必有支離而不合者矣易曰形而上者謂之道形而下者謂之器語曰君子上達小人下達而孔子自謂下學而上達者灑掃應對詩書禮樂皆其所從學也而君子由是以達其道小人由是以得其器達其道故萬變而致一得其器故有守而不蕩此孔子之所以兩得之也蓋孔子之為政也周故示人以器而晦其道使達者有見而未達者不眩也老子之自為也深故示人以道而畧其器使達者易入而不恤其未達也要之其實皆

至於道而所從施之有先後耳三代之後釋氏與孔老  
並行於世其所以異者體道愈遠而立於世之表指天  
下之所不見以示人而不憂其不悟曰要將有悟者其  
說又老氏之眇也老子八十一章余嘗為之解其說如  
此

韓非

蘇軾

聖人之所為惡夫異端盡力而排之者非異端之能亂  
天下而天下之亂所由出也昔周之衰有老聃莊周列



禦寇之徒更為虛無淡泊之言而治其猖狂浮游之說  
紛紜顛倒而卒歸于無有由其道者蕩然莫得其當是  
以忘乎富貴之樂而齊乎死生之分此不得志於天下  
高世遠舉之人所以放心而無憂雖非聖人之道而其  
用意固亦無惡於天下自老聃之死百餘年有商鞅韓  
非著書言治天下無若刑名之嚴及秦用之終於勝廣  
之亂教化不足而法有餘秦以不祀而天下被其毒後  
世之學者知申韓之罪而不知老聃莊周之使然何者

仁義之道起於夫婦父子兄弟相愛之間而禮法刑政之原出於君臣上下相忌之際相愛則有所不忍相忌則有所不敢不敢與不忍之心合而後聖人之道得存乎其中今老聃莊周論君臣父子之間汎汎乎若萍游於江湖而適相值也夫是以父不足愛而君不足忌不忌其君不愛其父則仁不足以懷義不足以勸禮樂不足以化此四者皆不足用而欲置天下於無有夫無有豈誠足以治天下哉商鞅韓非求為其說而不得其

所以輕天下而齊萬物之術是以敢為殘忍而無疑今夫不忍殺人而不足以為仁而仁亦不足以治民則是殺人不足以為不仁而不仁亦不足以亂天下如此則舉天下唯吾之所為刀鋸斧鉞何施而不可昔者夫子未嘗一日易其言雖天下之小物亦莫不有所畏今其視天下眇然若不足為者此其所以輕殺人歟太史遷曰申子卑卑施於名實韓子引繩墨切事情明是非其極慘覈少恩皆原於道德之意嘗讀而思之事固有不

可相謀而相感者莊老之後其禍為申韓由三代之衰至于今凡所以亂聖人之道者其弊固已多矣而未知其所終奈何其不為之所也

荀卿

蘇軾

嘗讀孔子世家觀其言語文章循循莫不有規矩不敢放言高論言必稱先王然後知聖人憂天下之深也茫乎不知其畔岸而非遠也浩乎不知其津涯而非深也其所言者匹夫匹婦之所共知而所行者聖人有所不

能盡也嗚呼是亦足矣使後世有能盡吾說者雖為聖人無難而不能者不失為寡過而已矣子路之勇子貢之辯冉有之智此三者皆天下之所謂難能而可貴者也然三子者每不為夫子之所悅顏淵默然不見其所能若無以異於衆人者而夫子亟稱之且夫學聖人者豈必其言之云爾哉亦觀其意之所嚮而已夫子以為後世必有不足行其說者矣必有竊其說而為不義者矣是故其言平易正直而不敢為非常可喜之論要在

於不可易也昔者常怪李斯事荀卿既而焚滅其書大  
變古先聖王之法於其師之道不啻若寇讐及今觀荀  
卿之書然後知李斯之所以事秦者皆出於荀卿而不  
足怪也荀卿者喜為異說而不讓敢為高論而不顧者  
也其言愚人之所驚小人之所喜也子思孟軻世之所  
謂賢人君子也荀卿獨曰亂天下者子思孟軻也天下  
之人如此其衆也仁人義士如此其多也荀卿獨曰人  
性惡桀紂性也堯舜偽也由是觀之意其為人必也剛

復不遜而自許太過彼李斯者又特甚者耳今夫小人之為不善猶必有所顧忌是以夏商之亡桀紂之殘暴而先王之法度禮樂刑政猶未至於絕滅而不可考者是桀紂猶有所存而不敢盡廢也彼李斯者獨能奮而不顧焚燒夫子之六經烹滅三代之諸侯破壞周公之井田此亦必有所恃者矣彼見其師歷詆天下之賢人自是其愚以為古先聖王皆無足法者不知荀卿特以快一時之論而荀卿亦不知其禍之至於此也其父殺

人報仇其子必且行劫荀卿明王道述禮樂而李斯以其學亂天下其高談異論有以激之也孔孟之論未嘗異也而天下卒無有及者苟天下果無有及者則尚安以求異為哉

揚雄

蘇軾

昔之為性論者多矣而不能定于一始孟子以為善而荀子以為惡揚子以為善惡混而韓愈者又取夫三子之說而折之以孔子之論離性以為三品曰中人可以



上下而上智與下愚不移以為三子者皆出乎其中而遺其上下而天下之所是者於愈之說多焉嗟夫是未知乎所謂性者而以夫才者言之夫性與才相近而不同其別不啻若白黑之異也聖人之所與小人共之而皆不能逃焉是真所謂性也而其才固將有所不同今夫木得土而後生雨露風氣之所養暢然而遂茂者是木之所同也性也而至於堅者為榦柔者為輪大者為楹小者為桷桷之不可以為楹輪之不可以為榦是豈

其性之罪耶天下之言性者皆雜乎才而言之是以紛而不能一也孔子之所謂中人可以上下而上智與下愚不移者是論其才也而至於言性則未嘗斷其善惡曰性相近也習相遠也而已韓愈之說則又有甚者離性以為情而合才以為性是故其論終莫能通彼以為性者果泊然而無為耶則不當復有善惡之說苟性而有善惡也則夫所謂情者乃吾所謂性也人生而莫不有飢寒之患牝牡之欲今告乎人曰飢而食渴而飲

男女之欲不出於人之性也可乎是天下知其不可也  
聖人無是無由以為聖而小人無是無由以為惡聖人  
以其喜怒哀懼愛惡欲七者御之而之乎善小人以是  
七者御之而之乎惡由此觀之則夫善惡者性之所能  
之而非性之所能有也且夫言性者安以其善惡為哉  
雖然揚雄之論則固已近之曰人之性善惡混修其善  
則為善人修其惡則為惡人此其所以為異者唯其不  
知性之不能以有夫善惡而以為善惡之皆出乎性也

而已乎太古之初本非有善惡之論唯天下之所同安者聖人指以為善而一人之所獨樂者則名以為惡天下之人固將即其所樂而行之孰知夫聖人唯其一人之獨樂不能勝天下之所同安是以有善惡之辨而諸子之意將以善惡為聖人之私說不已踈乎而韓愈又欲以書傳之所聞昔人之事迹而折夫三子之論區區乎以后稷之岐嶷文王之不勤瞽鯀管蔡之迹而明之聖人之論性也將以盡萬物之理與衆人之所共知者

以折天下之疑而韓愈欲以一人之才定天下之性且其言曰今日言性者皆雜乎佛老愈之說以為性之無與乎情而喜怒哀樂皆非性者是愈流入於佛老而不自知也

韓愈

蘇軾

聖人之道有趨其名而好之者有安其實而樂之者珠璣犀象天下莫不好奔走悉力爭鬪奪取其好之不可謂不至也然不知其所以好之之實至於粟米蔬肉桑


麻布帛天下之人內之於口而知其所以為美被之於身而知其所以為安此非有所役乎其名也韓愈之於聖人之道蓋亦知好其名矣而未能樂其實何者其為論甚高其待孔子孟軻甚尊而拒楊墨佛老甚嚴此其用力亦不可謂不至也然其論至於理而不精支離蕩佚往往自叛其說而不知昔者宰我子貢有若更稱其師以為生民以來未有如夫子之盛雖堯舜之賢亦所不及其尊道好學亦已至矣然而君子不以為貴曰宰

我子貢有若智足以知聖人之汙而已矣若夫顏淵豈亦云爾哉蓋亦曰夫子循循然善誘人由此觀之聖人之道果不在於張而大之也韓愈者知好其名而未能樂其實者也愈之原人曰天者日月星辰之主也地者山川草木之主也人者飛潛動植之主也主而暴之不得其為主之道矣是故聖人一視而同仁篤近而舉遠夫聖人之所為異乎墨者以其有別焉耳今愈之言曰一視而同仁則是以待人之道待萬物何異乎愛無差

等者也而可乎教之使有能化之使有知是待人之仁也殺之有時而用之有節是待禽獸之仁也若之何其一之儒墨之相戾不啻若胡越而其疑似之間相去不能以髮宜乎愈之以為一也孔子曰汎愛衆而親仁仁者之為親則是孔子不無愛也祭如在祭神如神在神不可知而祭者之心以為如其存焉則是孔子不明鬼也儒者之患患在於論性以為喜怒哀樂皆出於情而非性之所有夫有喜有怒而後有仁義有哀有樂而後



有禮樂以為仁義禮樂皆出於情而非性則是相率而叛聖人之教也老子曰能嬰兒乎喜怒哀樂苟不出乎性而出乎情則是相率而為老子之嬰兒也儒者或曰老易夫易豈老子之徒歟而儒者至有以老子說易則是離性以為情者其弊固至此也嗟夫君子之為學知其人之所長而不知其弊豈可謂善學耶



文編卷二十九





欽定四庫全書

集部  
文編卷三十

詳校官檢討臣德生

侍讀臣孫球覆勘

總校官進士臣楊懋珩

校對官編修臣汪鏞

謄錄監生臣桑英

欽定四庫全書

史編卷三十

明 唐順之 編

過秦論

賈誼

秦并兼諸侯山東三十餘郡繕津關據險塞修甲兵而  
守之然陳涉以戍卒散亂之衆數百奮臂大呼不用弓  
戟之兵鉏耰白挺望屋而食橫行天下秦人阻險不守  
關梁不闔長戟不刺強弩不射楚師深入戰於鴻門曾

無藩籬之難於是山東大擾諸侯並起豪俊相立秦使章邯將而東征章邯因以三軍之衆要市於外以謀其上羣臣之不信可見於此矣子嬰立遂不悟藉使子嬰有庸主之才僅得中佐山東雖亂秦之地可全而有宗廟之祀未當絕也秦地被山東雖亂秦之地可全而有宗自繆公以來至於秦王二十餘君常為諸侯雄豈世世賢哉其勢居然也且天下嘗同心并力而攻秦矣當此之世賢智竝列良將行其師賢相通其謀然困於阻險

而不能進秦乃延入戰而為之開關百萬之徒逃北而  
遂壞豈勇力智慧不足哉形不利勢不便也秦小邑并  
大城守險塞而軍高壘毋戰閉關據阨荷戟而守之諸  
侯起於匹夫以利合非有素王之行也其交未親其下  
未附名為亡秦其實利之也彼見秦阻之難犯也必退  
師安土息民以待其敝收弱扶疲以令大國之君不患  
不得意於海內貴為天子富有天下而身為禽者其救  
敗非也秦王足已不問遂過而不變二世受之因而不



改暴虐以重禍子嬰孤立無親危弱無輔三主惑而終身不悟亡不亦宜乎當時也世非無深慮知化之士也然所以不敢盡忠拂過者秦俗多忌諱之禁忠言未卒於口而身為戮沒矣故使天下之士傾耳而聽重足而立拊口而不言是以三主失道忠臣不敢諫智士不敢謀天下已亂奸不上聞豈不哀哉先王知雍蔽之傷國也故置公卿大夫士以飾法設刑而天下治其強也禁暴誅亂而天下服其弱也五伯征而諸侯從其削也

內守外附而社稷存故秦之盛也繁法嚴刑而天下振  
及其衰也百姓怨而海內叛矣故周五序得其道而千  
餘歲不絕秦本末並失故不長久由此觀之安危之統  
相去遠矣野諺曰前事不忘後事之師也是以君子為  
國觀之上古驗之當世參以人事察盛衰之理審權勢  
之宜去就有序變化應時故曠日長久而社稷安矣  
秦孝公據殽函之固擁雍州之地君臣固守以窺周室  
有席卷天下包舉宇內囊括四海之意并吞八荒之心

當是時也商君佐之內立法度務耕織修守戰之備外連衡而鬪諸侯於是秦人拱手而取西河之外孝公既沒惠文武昭襄蒙故業因遺策南兼漢中西舉巴蜀東割膏腴之地北收要害之郡諸侯恐懼會盟而謀弱秦不愛珍器重寶肥美之地以致天下之士合從締交相與為一當是時齊有孟嘗趙有平原楚有春申魏有信陵此四君者皆明智而忠信寬厚而愛人尊賢重士約從離衡并韓魏燕趙齊楚宋衛中山之衆於是六國之

士有甯越徐尚蘇秦杜赫之屬為之謀齊明周最陳軫  
昭滑樓緩翟景蘇厲樂毅之徒通其意吳起孫臏帶佗  
兒良王廖田忌廉頗趙奢之朋制其兵嘗以十倍之地  
百萬之衆叩關而攻秦秦人開關延敵九國之師逡巡  
遁逃而不敢進秦無亡矢遺鏃之費而天下諸侯已困  
矣於是從散約解爭割地而奉秦秦有餘力而制其敝  
追亡逐北伏尸百萬流血漂櫓因利乘便宰割天下分  
裂河山強國請服弱國入朝廷及孝文王莊襄王享國

日淺國家無事及至秦王續六世之餘烈振長策而御  
宇內吞二周而亡諸侯履至尊而制六合執捶拊以鞭  
笞天下威振四海南取百越之地以為桂林象郡百越  
之君俛首繫頸委命下吏乃使蒙恬北築長城而守藩  
籬却匈奴七百餘里胡人不敢南下而牧馬士不敢彎  
弓而報怨於是廢先王之道焚百家之言以愚黔首墮  
名城殺豪俊收天下之兵聚之咸陽銷鋒鑄鐻以為金  
人十二以弱黔首之民然後斬華為城因河為池據億

丈之城臨不測之谿以為固良將勁弩守要害之處信臣精卒陳利兵而誰何天下已定秦王之心自以為關中之固金城千里子孫帝王萬世之業也秦王既沒餘威振於殊俗陳涉甕牖繩樞之子氓隸之人而遷徙之徒才能不及中人非有仲尼墨翟之賢陶朱倚頓之富躡足行伍之間而倔起什伯之中率罷散之卒將數百之衆轉而攻秦斬木為兵揭竿為旗天下雲集響應贏糧而景從山東豪俊遂竝起而亡秦族矣且夫天下非

小弱也雍州之地殽函之固自若也陳涉之位非尊於齊楚燕趙韓魏宋衛中山之君鉏耰棘矜非鏃於句戟長鎗也適戍之衆非抗於九國之師也深謀遠慮行軍用兵之道非及鄉時之士也然而成敗異變功業相反也試使山東之國與陳涉度長絜大比權量力則不可同年而語矣然秦以區區之地致萬乘之權招八州而朝同列百有餘年矣然後以六合為家殽函為宮一夫作難而七廟隳身死人手為天下笑者何也仁義不施

而攻守之勢異也

秦并海內兼諸侯南面稱帝以養四海天下之士靡然  
鄉風若是者何也曰近古之無王者久矣周室卑微五  
霸既沒令不行於天下是以諸侯力政彊侵弱衆暴寡  
兵革不休士民罷敝今秦南面而王天下是有天子  
也既元元之民冀得安其性命莫不虛心而仰上也當  
此之時守威定功安危之本在於此矣秦王懷貪鄙之  
心行自奮之智不信功臣不親士民廢王道立私權禁



文書而酷刑法先詐力而後仁義以暴虐為天下始夫  
并兼者高詐力安定者貴順權此言取與守不同術也  
秦離戰國而王天下其道不易其政不改是其所以取  
之守之者異也孤獨而有之故其亡可立而待借使秦  
王計上世之事竝殷周之迹以制御其政後雖有淫驕  
之主而未有傾危之患也故三王之建天下名號顯美  
功業長久今秦二世立天下莫不引領而觀其政夫寒  
者利裋褐而饑者甘糟糠天下之嚮嚮新主之資也此

言勞民之易為仁也鄉使二世有庸主之行而任忠賢  
臣主一心而憂海內之患縞素而正先帝之過裂地分  
民以封功臣之後建國立君以禮天下虛囹圄而免刑  
戮除去收帑污穢之罪使各返其鄉里發倉廩散財幣  
以振孤獨窮困之士輕賦少事以佐百姓之急約法省  
刑以持其後使天下之人皆得自新更節修行各慎其  
身塞萬民之望而以威德與天下天下集矣即四海之  
內皆謹然各自安樂其處惟恐有變雖有狡猾之民無

離上之心則不軌之臣無以飾其智而暴亂之姦止矣  
二世不行此術而重之以無道壞宗廟與民更始作阿  
房宮繁刑嚴誅吏治刻深賞罰不當賦斂無度天下多  
事吏弗能紀百姓窮困而主弗收恤然後姦偽並起而  
上下相遁蒙罪者衆刑戮相望於道而天下苦之自君  
卿以下至於衆庶人懷自危之心親處窮困之實咸不  
安其位故易動也是以陳涉不用湯武之賢不藉公侯  
之尊奮臂於大澤而天下響應者其民危也故先王見

始終之變知存亡之機是以牧民之道務在安之而已  
天下雖有逆行之臣必無響應之助矣故曰安民可與  
行義而危民易與為非此之謂也

封建論

柳宗元

天地果無初乎吾不得而知之也生人果有初乎吾不  
得而知之也然則孰為近曰有初為近孰明之由封建  
而明之也彼封建者更古聖王堯舜禹湯文武而莫能  
去之蓋非不欲去之也勢不可也勢之來其生人之初

乎不初無以有封建封建非聖人意也彼其初與萬物皆生草木榛榛鹿豕狉狉人不能搏噬而且無毛羽莫克自奉自衛荀卿有言必將假物以為用者也夫假物者必爭爭而不已必就其能斷曲直者而聽命焉其智而明者所伏必衆告之以直而不改必痛之而後畏由是君長刑政生焉故近者聚而為羣羣之分其爭必大大而後有兵有德又有大者衆羣之長又就而聽命焉以安其屬於是有諸侯之列則其爭又有大者焉德又

大者諸侯之列又就而聽命焉以安其封於是有方伯  
連帥之類則其爭又有大者焉德又大者方伯連帥之  
類又就而聽命焉以安其人然後天下會於一是故有  
里胥而後有縣大夫有縣大夫而後有諸侯有諸侯而  
後有方伯連帥有方伯連帥而後有天子自天子至於  
里胥其德在人者死必求其嗣而奉之故封建非聖人  
意也勢也夫堯舜禹湯之事遠矣及有周而甚詳周有  
天下裂土田而瓜分之設五等邦羣后布履星羅四周

於天下輪運而輻集合為朝覲會同離為守臣扞城然  
而降於夷王害禮傷尊下堂而迎覲者歷於宣王挾中  
興復古之德雄南征北伐之威卒不能定魯侯之嗣陵  
夷迄於幽厲王室東徙而自列為諸侯厥後問鼎之輕  
重者有之射王中肩者有之伐凡伯誅萇弘者有之天  
下垂戾無君君之心余以為周之喪久矣徒建空名於  
公侯之上耳得非諸侯之盛彊末大不掉之咎歟遂判  
為十二合為七國威分於陪臣之邦國殄於後封之秦

則周之敗端其在乎此矣秦有天下裂都會而為之郡  
邑廢侯衛而為之守宰據天下之雄圖都六合之上游  
攝制四海運於掌握之內此其所以為得也不數載而  
天下大壞其有由矣亟役萬人暴其威刑竭其貨賄負  
鋤挺謫戍之徒圜視而合從大呼而成羣時則有叛人  
而無叛吏人怨於下而吏畏於上天下相合殺守劫令  
而並起咎在人怨非郡邑之制失也漢有天下矯秦之  
枉徇周之制割海內而立宗子封功臣數年之間奔命



扶傷之不暇困平成病流矢陵遲不救者三代後乃謀臣獻畫而離削自守矣然而封建之始郡國居半時則有叛國而無叛郡秦制之得亦以明矣繼漢而帝者雖百代可知也唐興制州邑立守宰此其所以為宜也然猶桀猾時起虐害方域者失不在於州而在於兵時則有叛將而無叛州州縣之設固不可革也或者曰封建者必私其土子其人適其俗修其理施化易也守宰者苟其心思遷其秩而已何能理乎余又非之周之事迹

斷可見矣列侯驕盈黷貨事戎大凡亂國多理國寡侯  
伯不得變其政天子不得變其君私土子人者百不有  
一失在於制不在於政周事然也秦之事迹亦斷可見  
矣有理人之制而不委郡邑是矣有理人之臣而不使  
守宰是矣郡邑不得正其制守宰不得行其理酷刑苦  
役而萬人側目失在於政不在於制秦事然也漢興天  
子之政行於郡不行於國制其守宰不制其侯王侯王  
雖亂不可變也國人雖病不可除也及夫大逆不道然

後掩捕而遷之勒兵而移之耳大逆未彰姦利浚財怙勢作威大刻于民者無如之何及夫郡邑可謂理且安矣何以言之且漢知孟舒於田叔得魏尚於馮唐聞黃霸之明審覩汲黯之簡靖拜之可也復其位可也卧而委之以輯一方可也有罪得以黜有能得以賞朝拜而不道夕斥之矣夕受而不法朝斥之矣設使漢室盡城邑而侯王之縱令其亂人戚之而已孟舒魏尚之術莫得而施黃霸汲黯之化莫得而行明譴而導之拜受而

退已違矣下令而削之締交合從之謀周於同列則相顧裂眦勃然而起幸而不起則削其半削其半民猶瘁矣曷若舉而移之以全其人乎漢事然也今國家盡制郡邑連制守宰其不可變也固矣善制兵謹擇守則理平矣或者又曰夏商周漢封建而延秦郡邑而促尤非所謂知理者也魏之承漢也封爵猶建晉之承魏也因循不革而二姓陵替不聞延祚今矯而變之垂二百祀大業彌固何繫於諸侯哉或者又以為殷周聖王也而

不革其制固不當復議也是大不然夫殷周之不革者  
是不得已也蓋以諸侯歸殷者三千馬資以黜夏湯不  
得而廢歸周者八百馬資以勝殷武王不得而易循之  
以為安仍之以為俗湯武之所不得已也夫不得已非  
公之大者也私其力於己也私其衛於子孫也秦之所  
以革之者其為制公之大者也其情私也私其一己之  
威也私其盡臣畜於我也然而公天下之端自秦始皇  
天下之道理安斯得人者也使賢者居上不肖者居下

而後可以理安今夫封建者繼世而理繼世而理者上  
果賢乎下果不肖乎則生人之理亂未可知也將欲利  
其社稷以一其人之視聽則又有世大夫世食祿邑以  
盡其封略聖賢生於其時亦無以立於天下封建者為  
之也豈聖人之制使至於是乎吾固曰非聖人之意也  
勢也

爭臣論

韓愈

或問諫議大夫陽城於愈可以為有道之士乎哉學廣

而聞多不求聞於人也行古人之道居於晉之鄙晉之鄙人薰其德而善良者幾千人大臣聞而薦之天子以爲諫議大夫夫人皆以爲華陽子不色喜居於位五年矣視其德如在野彼豈以富貴移易其心哉愈應之曰是易所謂恒其德貞而夫子凶者也惡得爲有道之士乎哉在易蠱之上九云不事王侯高尚其事蹇之六二則曰王臣蹇蹇匪躬之故夫亦以所居之時不一而所蹈之德不同也若蠱之上九居無用之地而致匪躬之節

以蹇之六二在王臣之位而高不事之心則冒進之患  
生曠官之刺興志不可則而尤不終無也今陽子在位  
不為不久矣聞天下之得失不為不熟矣天子待之不  
為不加矣而未嘗一言及於政視政之得失若越人視  
秦人之肥瘠忽焉不加喜戚於其心問其官則曰諫議  
也問其祿則曰下大夫之秩也問其政則曰我不知也  
有道之士固如是乎哉且吾聞之有官守者不得其職  
則去有言責者不得其言則去今陽子以為得其言乎



哉得其言而不言與不得其言而不去無一可者也陽  
子將為祿仕乎古之人有云仕不為貧而有時乎為貧  
謂祿仕者也宜乎辭尊而居卑辭富而居貧若抱關擊  
柝者可也蓋孔子嘗為委吏矣嘗為乘田矣亦不敢曠  
其職必曰會計當而已矣必曰牛羊遂而已矣若陽子  
之秩祿不為卑且貧章章明矣而如此豈可乎哉或曰  
否非若此也夫陽子惡訕上者惡為人臣招其君之過  
而以為名者故雖諫且議使人不得而知焉書曰爾有

嘉謀嘉猷則入告爾后于內爾乃順之于外曰斯謀斯猷惟我后之德夫陽子之用心亦若此者愈應之曰若陽子之用心如此滋所謂惑者矣入則諫其君出不使人知者大臣宰相者之事非陽子之所宜行也夫陽子本以布衣隱於蓬蒿之下主上嘉其行誼擢在此位官以諫為名誠宜有以奉其職使四方後代知朝廷有直言骨鯁之臣天子有不僭賞從諫如流之美庶巖穴之士聞而慕之束帶結髮願進於闕下而伸其辭說致吾

君於堯舜熙鴻號於無窮也若書所謂則大臣宰相之事非陽子之所宜行也且陽子之心將使君人者惡聞其過乎是啓之也或曰陽子之不求聞而人聞之不求用而君用之不得已而起守其道而不變何子過之深也愈曰自古聖人賢士皆非有求于聞用也閔其時之不平人之不义得其道不敢獨善其身而必以兼濟天下也孜孜矻矻死而後已故禹過家門不入孔席不暇暖而墨突不得黔彼二聖一賢者豈不知自安逸之為

樂哉誠畏天命而悲人窮也夫天授人以聖賢才能豈使自有餘而已誠欲以補其不足者也耳目之於身也耳司聞而目司見聽其是非視其險易然後身得安焉聖賢者時人之耳目也時人者聖賢之身也且陽子之不賢則將役於賢以奉其上矣若果賢則固畏天命而閔人窮也惡得以自暇逸乎哉或曰吾聞君子不欲加諸人而惡訐以為直者若吾子之論直則直矣無乃傷於德而費於辭乎好盡言以招人過國武子之所以見

殺於齊也。吾子其亦聞乎？愈曰：君子居其位則思死其官，未得位則思修其辭以明其道。我將以明道也，非以為直而加人也。且國武子不能得善人而好盡言於亂國，是以見殺。傳曰：惟善人能受盡言。謂其聞而能改之也。子告我曰：陽子可以為有道之士也。今雖不能及已。陽子將不得為善人乎哉？

諫上

蘇洵

古今論諫常與諷而少直。其說蓋出於仲尼。吾以為諷

直一也顧用之之術何如耳伍舉進隱語楚王淫益甚茅焦解衣危論秦帝立悟諷固不可盡與直亦未易少之吾故曰顧用之之術何如耳然則仲尼之說非乎曰仲尼之說純乎經者也吾之說參乎權而歸乎經者也如得其術則人君有少不為桀紂者吾百諫而百聽矣况虛已者乎不得其術則人君有少不若堯舜者吾百諫而百不聽矣况逆忠者乎然則奚術而可曰機智勇辯如古游說之士而已夫遊說之士以機智勇辯濟其

詐吾欲諫者以機智勇辯濟其忠請備論其效周衰游  
說熾於列國自是世有其人吾獨怪夫諫而從者百一  
說而從者十九諫而死者皆是說而死者未嘗聞然而  
抵觸忌諱說或甚於諫由是知不必乎諷諫而必乎術  
也說之術可為諫法者五理論之勢禁之利誘之激怒  
之隱諷之之謂也觸龍以趙后愛女賢於愛子未旋踵  
而長安君出質甘羅以杜郵之死詰張唐而相燕之行  
有日趙卒以兩賢王之意語燕而立歸武臣此理而諭

之也子貢以內憂教田常而齊不得伐魯武公以麋鹿  
脅項襄而楚不敢圖周魯連以烹醢懼垣衍而魏不果  
帝秦比勢而禁之也田生以萬戶侯啓張卿而劉澤封  
朱建以富貴餌閔孺而辟陽赦鄒陽以愛幸悅長君而  
梁王釋比利而誘之也蘇秦以牛後羞韓而惠王按劍  
太息范雎以無王恥秦而昭王長跪請教酈生以助秦  
凌漢而沛公輟洗聽計比激而怒之也蘇代以土偶笑  
田文楚人以弓繳感襄王蒯通以娶婦悟齊相比隱而



諷之也五者相傾險詖之論雖然施之忠臣足以成功  
何則理而諭之主雖昏必悟勢而禁之主雖驕必懼利  
而誘之主雖怠必奮激而怒之主雖懦必立隱而諷之  
主雖暴必容悟則明懼則恭奮則勤立則勇敢則寬致  
君之道盡於此矣吾觀昔之臣言必從理必濟莫若唐  
魏鄭公其初實學縱橫之說此所謂得其術者歟噫龍  
逢比干不獲稱良臣無蘇秦張儀之術也蘇秦張儀不  
免為游說無龍逢比干之心也是以龍逢比干吾取其

心不取其術蘇秦張儀吾取其術不取其心以為諫法

諫下

蘇洵

夫臣能諫不能使君必納諫非真能諫之臣君能納諫不能使臣必諫非真能納諫之君欲君必納乎嚮之論備矣欲臣必諫乎吾其言之夫君之大天也其尊神也其威雷霆也人之不能抗天觸神忤雷霆亦明矣聖人知其然故立賞以勸之傳曰興王賞諫臣是也猶懼其巽阿諛使一日不得聞其過故制刑以威之書曰臣

下不匡其刑墨是也人之情非病風喪心未有避賞而  
就刑者何苦而不諫哉賞與刑不設則人之情又何苦  
而抗天觸神忤雷霆哉自非性忠義不悅賞不畏罪誰  
欲以言博死者人君又安能盡得性忠義者而任之今  
有三人焉一人勇一人勇怯半一人怯有與之臨乎淵  
谷者且告之曰能跳而越此謂之勇不然為怯彼勇者  
恥怯必跳而越焉其勇怯半者與怯者則不能也又告  
之曰跳而越者與千金不然則否彼勇怯半者奔利必

跳而越焉其怯者猶未能也須臾顧見猛虎暴然向逼則怯者不待告跳而越之如康莊矣然則人豈有勇怯哉要在以勢驅之耳君之難犯猶淵谷之難越也所謂性忠義不悅賞不畏罪者勇者也故無不諫焉悅賞者勇怯半者也故賞而後諫焉畏罪者怯者也故刑而後諫焉先王知勇者不可常得故以賞為千金以刑為猛虎使其前有所趨後有所避其勢不得不極言規失此三代所以興也末世不然遷其賞於不諫遷其刑於諫

宜乎臣之噤口卷舌而亂亡隨之也間或賢君欲聞其過亦不過賞之而已嗚呼不有猛虎彼怯者肯越淵谷乎此無他墨刑之廢耳三代之後如霍光誅昌邑不諫之臣者不亦鮮哉今之諫賞時或有之不諫之刑缺然無矣苟增其所有有所無則諛者直佞者忠況忠直者乎誠如是欲聞讜言而不獲吾不信也

守道論

柳宗元

或問曰守道不如守官如何對曰是非聖人之言傳之

者誤也官也者道之器也離之非也未有守官而失道  
守道而失官之事者是固非聖人言乃傳之者誤也夫  
皮冠者是虞人之物也物者道之準也守其物由其準  
而後其道存焉苟舍之是失道也凡聖人之所以為經  
紀為名物無非道者命之曰官官足以行吾道云爾是  
故立之君臣官府衣裳與馬章綬之數會朝表著周旋  
行列之等是道之所存也則又示之典命書制符璽奏  
復之文叅伍殷輔陪臺之役是道之所由也則又勸之

以爵祿慶賞之美懲之以黜遠鞭朴梏拳斬殺之慘是道之所行也故自天子至於庶民咸守其經分而無有失道者和之至也失其物去其準道從而喪矣易其小者而大者亦從而喪矣古者居其位思死其官可易而失之哉禮記曰道合則服從不可則去孟子曰有官守者不得其職則去然則失其道而居其官者古之人不與也是故在上不為抗在下不為損矢人者不為不仁函人者不為仁率其職司其局交相致以全其工也易

位而處各安其分而道達於天下也且夫官所以行道也而曰守道不如守官蓋亦喪其本矣未有守官而失道守道而失官之事者也是非聖人之言傳之者誤也果矣

六逆論

柳宗元

春秋左氏言衛州吁之事因載六逆之說曰賤妨貴少陵長遠間親新間舊小加大淫破義六者亂之本也余謂少陵長小加大淫破義是三者固誠為亂矣然其所



謂賤妨貴遠間親新間舊雖為理之本可也何必曰亂  
夫所謂賤妨貴者蓋斥言擇嗣之道予以母貴者也若  
貴而愚賤而聖且賢以是而妨之其為理本大矣而可  
捨之以從斯言乎此其不可固也夫所謂遠間親新間  
舊者蓋言任用者之道也使親而舊者愚遠而新者聖  
且賢以是而間之其為理本亦大矣又可捨之以從斯  
言乎必從斯言而亂天下謂之師古訓可乎此又不可  
者也嗚呼是三者擇君置臣之事天下理亂之本也為

書者執斯言著一定之論以遺後代上智之人固不惑  
於是自中人而降守以為大據而以致敗亂者固不乏  
焉晉厲死而悼公入乃理宋襄嗣而子魚退乃亂貴不  
足尚也秦用張祿而黜穰侯乃安魏相成璜而疎吳起  
乃危親不足與也苻氏進王猛而殺樊世乃興胡亥任  
趙高而族李斯乃滅舊不足恃也顧所信何如耳然則  
斯言殆可以廢矣噫古之言理者罕能盡其說建一言  
立一辭則詭訥而不安謂之是可也謂之非亦可也混

然而已教於後世莫知其所以去就明者慨然將定其  
是非則拘儒瞽生相與羣而咻之以為狂為怪而欲世  
之多有知者可乎夫中人可以及化者天下為不少矣  
然而罕有知聖人之道則固為書者之罪也

縱囚論 歐陽修

信義行於君子而刑戮施於小人刑入於死者乃罪大  
惡極此又小人之尤甚者也寧以義死不苟幸生而視  
死如歸此又君子之尤難者也方唐太宗之六年錄大

辟囚三百餘人縱使還家約其自歸以就死是以君子之難能期小人之尤者以必能也其囚及期而卒自歸無後者是君子之所難而小人之所易也此豈近於人情或曰罪大惡極誠小人矣及施恩德以臨之可使變而為君子蓋恩德入人之深而移人之速有如是者矣曰太宗之為此所以求此名也然安知夫縱之去也不意其必來以冀免所以縱之乎又安知夫被縱而去也不意其自歸而必獲免所以復來乎夫意其必來而縱

之是上賊下之情也意其必免而復來是下賊上之心也吾見上下交相賊以成此名也烏有所謂施恩德與夫知信義者哉不然太宗施德於天下於茲六年矣不能使小人不為極惡大罪而一日之恩能使視死如歸而存信義此又不遁之論也然則何為而可曰縱而來歸殺之無赦而又縱之而又來則可知為恩德之致爾然此必無之事也若夫縱而來歸而赦之可偶一為之爾若屢為之則殺人者皆不死是可為天下之常法乎

不可為常者其聖人之法乎是以堯舜三王之治必本於人情不立異以為高不逆情以干譽

大臣上 蘇軾

以義正君而無害於國可謂大臣矣天下不幸而無明君使小人執其權當此之時天下之忠臣義士莫不欲奮臂而擊之夫小人者必先得於其君而自固於天下是故法不可擊擊之而不勝身死其禍止於一身擊之而勝君臣不相安天下必亡是以春秋之法不待君命

而誅其側之惡人謂之叛晉趙鞅入於晉陽以叛是也  
世之君子將有志於天下欲扶其衰而救其危者必先  
計其後而為可居之功其濟不濟則命也是故功成而  
天下安之今小人君不誅而吾誅之則是侵君之權而  
不可居之功也夫既已侵君之權而能北面就人臣之  
位使君不吾疑者天下未嘗有也國之有小人猶人之  
有癭今人之癭必生於頸而附於咽是以不可去有賤  
丈夫者不勝其忿而決去之夫是以去疾而得死漢之

亡唐之滅由此故也自桓靈之後至於獻帝天下之權  
歸於內豎賢人君子進不容於朝退不容於野天下之  
怒可謂極矣當此之時議者以為天下之患獨在宦官  
宦官去則天下無事然竇武何進之徒擊之不勝止於  
身死袁紹擊之而勝漢遂以亡唐之衰也其迹亦大類  
此自輔國元振之後天子之廢立聽於宦官當此之時  
士大夫之論亦惟宦官之為去然而李訓鄭注元載之  
徒擊之不勝止於身死至於崔昌遐擊之而勝唐亦以



亡方其未去是纍然者癭而已矣及其既去則潰裂四出而繼之以死何者此侵君之權而不可居之功也且為人臣而不顧其君捐其身於一決以快天下之望亦已危矣故其成則為袁為崔敗則為何竇為訓注然則忠臣義士亦奚取於此哉夫竇武何進之亡天下悲之以為不幸然亦幸而不成使其成也二子者將何以居之故曰以義正君而無害於國可謂大臣矣

大臣下

蘇軾

天下之權在於小人君子之欲擊之也不亡其身則亡其君然則是小人者終不可去乎聞之曰迫人者其智淺迫於人者其智深非才有不同所居之勢然也古之為兵者圍師勿遏窮寇勿追誠恐其知死而致力則雖有衆無所用之故曰同舟而遇風則胡越可使相救如左右手小人之心自知其負天下之怨而君子之莫吾赦也則將日夜為計以備一旦卒然不可測之患今君子又從而疾惡之是以其謀不得不深其交不得不合

交合而謀深則其致毒也愈戾而不可解故凡天下之患起於小人而成於君子之速之也小人在內君子在外君子為客小人為主主未發而客先焉則小人之詞直而君子之勢近於不順直則可以欺衆而不順則難以令其下故昔之舉事者常以中道而衆散以至於敗則其理豈不甚明哉若夫智者則不然內以自固其君子之交而厚集其勢外以陽浮而不逆於小人之意以待其間寬之使不吾疾狃之使不吾慮啖之以利以昏

其智順適其意以殺其怒然後待其發而乘其隙推其墜而挽其絕故其用力也約而無後患莫為之先故君不怒而勢不偏如此者功成而天下安之今夫小人急之則合寬之則散是從古以然也見利不能不爭見患不能不避無信不能不相詐無禮不能不相瀆是故其交易間其黨易破也而君子不務寬之以待其變而急之以合其交亦已過矣君子小人雜居而未決為君子之計者莫若深交而無為苟不能深交而無為則小人

倒持其柄而乘吾隙昔漢高之亡以天下屬平勃及高后臨朝擅王諸呂廢黜劉氏平日縱酒無一言及用陸賈計以千金交歡絳侯卒以此誅諸呂定劉氏使此二人者而不相能則是將相相攻之不暇而何暇及於劉呂之存亡哉故其說曰將相和調則士豫附士豫附則天下雖有變而權不分嗚呼知此其足以為大臣矣夫

伊尹 蘇軾

辨天下之大事者有天下之大節者也立天下之大節

者狹天下者也夫以天下之大而不足以動其心則天下之大節有不足立而大事有不足辦者矣今夫匹夫匹婦亦知潔廉忠信之為美也使其果潔廉而忠信則其智慮未始不如王公大人之能也惟其所爭者止於簞食豆羹而簞食豆羹足以動其心則宜其智慮之不出乎此也簞食豆羹非其道不取則一鄉之人莫敢以不正犯之矣一鄉之人莫敢以不正犯之而不能辦一鄉之事者未之有也推此而上其不取者愈大則其所辦

者愈遠矣讓天下與讓簞食豆羹無以異也治天下與治一鄉亦無以異也然而不能者有所蔽也天下之富是簞食豆羹之積也天下之大是一鄉之推也非千金之子不能運千金之資販夫販婦得一金而不知所措非智不若所居之卑也孟子曰伊尹耕於有莘之野非其道也非其義也雖祿之天下弗受也夫天下不能動其心是故其才全以其全才而制天下是故臨大事而不亂古之君子必有高世之行非苟求為異而已卿相

之位千金之富有所不屑將以自廣其心使窮達利害不能為之芥蒂以全其才而欲有所為耳後之君子蓋亦嘗有其志矣得失亂其中而榮辱奪其外是以役役至於老死而不暇亦足悲矣孔子叙書至於舜禹皋陶相讓之際蓋未嘗不太息也夫以朝廷之尊而行匹夫之讓孔子安取焉取其不汲汲於富貴有以大服天下之心焉耳夫太甲之廢天下未嘗有是而伊尹始行之天下不以為驚以臣放君天下不以為僭既放而復立



太甲不以為專何則其素所不屑者足以取信於天下也彼其視天下眇然不足以動其心而豈忍以廢放其君求利也哉後之君子蹈常而習故惴惴焉懼不免於天下一為希濶之行則天下羣起而誚之不知求其素而以為古今之變時有所不可者亦已過矣夫

周公  
蘇軾

論周公者多異說何也周公居禮之變而處聖人之不幸宜乎說者之異也凡周公之所為亦不得已而已矣

若得已而不已則周公安得而為之成王幼不能為政  
周公執其權以王命賞罰天下是周公不得已者如此  
而已今儒者曰周公踐天子之位稱王而朝諸侯則是  
豈不可以已耶書曰周公位冢宰正百工羣叔流言又  
曰召公為保周公為師相成王為左右召公不說又曰  
周公曰王若曰則是周公未嘗踐天子之位而稱王也  
周公稱王則成王宜何稱將亦稱王耶將不稱耶不稱  
則是廢也稱王則是二王也而周公何以安之孔子曰

必也正名乎儒者之患患在於名實之不正故亦有以  
文王為稱王者是以聖人為後世之僭君急於為王者  
耶天下雖亂有王者在而已自王雖聖人不能以服天  
下昔高帝擊滅項籍統一四海諸侯大臣相率而帝之  
然且辭以不德惟陳勝吳廣乃囂囂乎急於自王而謂  
文王亦為之耶武王伐商師渡孟津會於牧野其所以  
稱先君之命命於諸侯者蓋猶曰文考而已至於武成  
既以柴望告天百工奔走受命於周而後稱曰我文考

文王克成厥勲由此觀之則是武王不敢一日妄尊其  
先君而況於文王之自王乎詩曰虞芮質厥成文王蹶  
厥生是亦追稱而已矣史記曰姬乎采芑歸乎田成子  
夫田常之時安知其為成子而稱之故凡以文王周公  
為稱王者皆過也是資後世之篡君而為之藉也陳賈  
問於孟子曰周公使管叔監商管叔以商叛知而使之  
是不仁不知是不智孟子曰周公弟也管叔兄也周公  
之過不亦宜乎從孟子之說則是周公未免於有過也

夫管蔡之叛非逆也是其智不足以深知周公而已矣  
周公之誅非疾之也其勢不得不誅也故管蔡非所謂  
大惡也兄弟之親而非有大惡則其道不得不封管蔡  
之封在武王之世也武王之世未知有周公成王之事  
苟無周公成王之事則管蔡何從而叛周公何從而誅  
之故曰周公居禮之變而處聖人之不幸也

周公一 蘇轍

伊尹既立太甲不明而放諸桐天下不以為不義武王

既歿成王幼周公攝天子之位朝諸侯於明堂而召公  
不悅管叔蔡叔咸叛天下幾至於不可救二者其故何  
也太甲既立矣而不足以治天下則夫伊尹猶有以辭  
於後世也蓋周公之事其迹無以異於伊尹然天下之  
人舉皆疑而不信此無足怪也何者天下未知夫成王  
之不明而周公攝則是周公未有以服天下之心而彊  
攝焉以為之上也且夫伊尹之攝其事有不得已而然  
耳太甲雖廢而伊尹未敢有所復立以召天下之亂故

寧以已攝焉而待夫太甲之自悔是以天下無疑乎其心今夫周公之際其勢未至於不得已也使成王拱手以居天下之上而周公為之佐以成王名號於天下而輔之以周公此所謂其勢之未至於不得已者矣而周公不居則夫天下之謗是周公之所自取也然愚以為不然挾天子以令天下此諸葛孔明之事耳而周公豈不足以知之蓋夫人臣惟無執天子之權人臣而執天子之權則必有忠於其心而後可以自免於難何者人

臣而用天子之事此天子之所忌也以一人之身上為天子之所忌而下為左右之大臣從而媒孽其短比古之忠臣所以盡心而不免於禍而世之姦雄之士所以動其無君之心而不顧者也使成王用事於天下而周公制其予奪之柄則愚恐成王有所不平於其心而管蔡之徒乘其隙而間之以至於亂也使成王有天子之虛名而不得制天下之政則愚恐周公有所不忍於其中赧然其有不安之心也是以寧取而攝之使成王無



與乎其間以破天下讒慝之謀而絕其爭權之心是以  
其後雖有管蔡之憂而天下不搖使其當時列於羣臣  
之間方其危疑擾攘而未決也則愚恐周公之禍非居  
東之所能免而管蔡得志於天下成王將遂不立也嗚  
呼其思之遠哉

朋黨論

歐陽修

臣聞朋黨之說自古有之惟幸人君辨其君子小人而  
已大凡君子與君子以同道為朋小人與小人以同利

為朋此自然之理也然臣謂小人無朋惟君子則有之  
其故何哉小人所好者祿利也所貪者財貨也當其同  
利之時暫相黨引以為朋者偽也及其見利而爭先或  
利盡而交疎則反相賊害雖其兄弟親戚不能相保故  
臣謂小人無朋其暫為朋者偽也君子則不然所守者  
道義所行者忠信所惜者名節以之修身則同道而相  
益以之事國則同心而共濟終始如一此君子之朋也  
故為人君者但當退小人之偽朋用君子之真朋則天

下治矣堯之時小人共工驩兜等四人為一朋君子八元八凱十六人為一朋舜佐堯退四凶小人之朋而進元凱君子之朋堯之天下大治及舜自為天子而皋夔稷契等二十二人竝列於朝更相稱美更相推讓凡二十二人為一朋而舜皆用之天下亦大治書曰紂有臣億萬惟億萬心周有臣三千惟一心紂之時億萬人各異心可謂不為朋矣然紂以亡國周武王之臣三千人為一大朋而周用以興後漢獻帝時盡取天下名士囚

禁之目為黨人及黃巾賊起漢室大亂後方悔悟盡解  
黨人而釋之然已無救矣唐之晚年漸起朋黨之論及  
昭宗時盡殺朝之名士或投之黃河曰此輩清流可投  
濁流而唐遂亡矣夫前世之主能使人人異心不為朋  
莫如紂能禁絕善人為朋莫如漢獻帝能誅戮清流之  
朋莫如唐昭宗之世然皆亂亡其國更相稱美推讓而  
不自疑莫如舜之二十二臣舜亦不疑而皆用之然而  
後世不謂舜為二十二人朋黨所欺而稱舜為聰明之

聖者以能辨君子與小人也周武之世舉其國之臣三千人共為一朋自古為朋之多且大莫如周然周用此以興者善人雖多而不厭也夫興亡治亂之迹為人君者可以鑒矣

續歐陽子朋黨

蘇軾

歐陽子曰小人欲空人之國必進朋黨之說嗚呼國之將亡此其徵歟禍莫大於權之移人而君莫危於國之有黨有黨則必爭爭則小人者必勝而權之所歸也君

安得不危哉何以言之君子以道事君人主必敬之而  
疎小人惟予言而莫予違人主必狎之而親疎者易間  
而親者難睽也而君子者不得志則奉身而退樂道不  
仕小人者不得志則徼倖復用惟怨之報此其所以必  
勝也蓋嘗論之君子如嘉禾也封植之甚難而去之甚  
易小人如惡草也不種而生去之復蕃世未有小人不  
除而治者也然去之為最難斥其一則援之者衆盡其  
類則衆之致怨也深小者復用而肆威大者得志而竊


國善人為之掃地世主為之屏息譬之斷蛇不死刺虎  
不斃其傷人則愈多矣齊田氏魯季孫是已齊魯之執  
事莫匪田季之黨也歷數君不忘其誅而卒之簡公弑  
昭哀失國小人之黨其不可除也如此而漢黨錮之獄  
唐白馬之禍忠義之士斥死無餘君子之黨其易盡也  
如此使世主知易盡者之可戒而不可除者之可懼則  
有瘳矣且夫君子者世無若是之多而善人亦無若是  
之衆也況才智之士銳於功名而嗜於進取者隨所用

耳孔子曰仁者安仁智者利仁未必皆君子也冉有從夫子則為門人之選從季氏則為聚斂之臣唐柳宗元劉禹錫使不陷叔文之黨其高才絕學亦足以為唐名臣矣昔樂懷子得罪於晉其黨皆出奔樂王鮒謂范宣子曰盍反州綽邢蒯勇士也宣子曰彼樂氏之勇也余何獲焉王鮒曰子為彼樂氏乃子之勇也嗚呼宣子蚤從王鮒之言豈獨獲二子之勇且安有曲沃之變哉愚以謂治道去泰甚耳苟黜其首惡而貸其餘使才者不



失富貴不才者無以致憾將為吾用之不暇又何怨之  
報乎人之所以為盜者衣食不足耳農夫市人焉保其  
不為盜而衣食既足盜豈有不能返農夫市人也哉故  
善除盜者開其衣食之門使復其業善除小人者誘以  
富貴之道使隳其黨以力取威勝者蓋未嘗不反為所  
噬昔曹叅之治齊曰慎無擾獄市獄市姦人之所容也  
知此亦庶幾於善治矣姦固不可長而亦不可不容也  
若姦無所容君子豈久安之道哉牛李之黨徧天下而

李德裕以一夫之力欲窮其類而致之必死此其所以  
不旋踵罹仇人之禍也姦臣復熾忠義益衰以力取威  
勝者果不可耶愚是以讀歐陽子之說而為君子小人  
之戒



文編卷三十